

especial consideración cos casos.», debe dicir: «terán especial consideración os casos.».

Na páxina 192, primeira columna, na disposición adicional décimo cuarta, onde di: «a Lei 21/2001, do 27 de decembro,», debe dicir: «a Lei 21/2001, do 27 de decembro, pola que se regulan as medidas fiscais e administrativas do novo sistema de financiamento das comunidades autónomas de réxime común e cidades con estatuto de autonomía,». E onde di: «Ministerio de Facenda.», debe dicir: «Ministerio de Economía e Facenda.».

Na páxina 193, segunda columna, na disposición derradeira quinta, onde di: «No mesmo prazo procederase a modificar o Real decreto 738/1997, do 23 de maio, e o Real decreto 996/2003, do 25 de xullo», debe dicir: «No mesmo prazo procederase a modificar o Real decreto 738/1997, do 23 de maio, polo que se aproba o Regulamento de axudas ás vítimas de delitos violentos e contra a liberdade sexual, e o Real decreto 996/2003, do 25 de xullo, polo que se aproba o Regulamento de asistencia xurídica gratuita.».

Nas páxinas 194 e 195, no anexo, deben suprimirse as referencias ao partido xudicial número 12 da provincia de Cádiz e ao partido xudicial número 8 da provincia de Málaga.

MINISTERIO DE AGRICULTURA, PESCA E ALIMENTACIÓN

6121 *ORDE APA/990/2005, do 14 de abril, pola que se establecen medidas específicas de protección en relación coa lingua azul.* («BOE» 91, do 16-4-2005.)

A lingua azul ou febre catarral ovina é unha enfermidade incluída no Código Zoonosanitario Internacional da Organización Mundial da Sanidade Animal (OIE) e na lista de enfermidades de declaración obrigatoria da Unión Europea. As medidas específicas de loita contra a enfermidade están reguladas polo Real decreto 1228/2001, do 8 de novembro, polo que se establecen medidas específicas de loita e erradicación da febre catarral ovina ou lingua azul.

O 13 de outubro de 2004, o programa de vixilancia da lingua azul previsto no artigo 11.1 b) do Real decreto 1228/2001, do 8 de novembro, aplicado pola Comunidade Autónoma de Andalucía, puxo de manifesto a circulación do virus da lingua azul na parte oriental da provincia de Cádiz. As medidas de protección a nivel comunitario foron adoptadas mediante a Decisión 2004/695/CE, da Comisión, do 14 de outubro de 2004, relativa a determinadas medidas de protección contra a febre catarral ovina ou lingua azul en España, e posteriormente mediante a Decisión 2005/138/CE, da Comisión, do 16 de febreiro de 2005, pola que se modifica a Decisión 2003/828/CE no que respecta aos traslados de animais dentro dunha zona restrinxida de España e Portugal, e a partir dela, en relación cos abrochos de febre catarral ovina nos devanditos Estados membros. Esta decisión foi posteriormente modificada co fin de permitir certos movementos domésticos, baseado nun cesamento temporal da actividade do vector transmisor da lingua azul, mediante a Decisión 2005/216/CE, da Comisión, do 9 de marzo de 2005. Posteriormente, o Comité Permanente da Cadea Alimentaria e da Sanidade Animal da Unión Europea emitiu informe favorable sobre unha proposta de decisión da Comisión Europea

pola que modifica a devandita normativa para establecer requisitos específicos para o movemento, desde zona restrinxida, de ovinos menores de dous meses de idade nados de femias vacinadas.

De acordo coa Lei 8/2003, do 24 de abril, de sanidade animal, e sen prexuízo das medidas adoptadas pola Comisión Europea, mediante a Orde APA/3411/2004, do 22 de outubro, establecéronse medidas específicas de carácter urxente respecto da lingua azul, ante a súa aparición no territorio peninsular español. Estas medidas foron posteriormente modificadas, á vista da evolución da enfermidade, e seguindo o criterio ao respecto do grupo de expertos previsto no Plan de Intervención a que se refire a disposición adicional única do Real decreto 1228/2001, do 8 de novembro, polo que se establecen medidas específicas de loita e erradicación da febre catarral ovina ou lingua azul, mediante sucesivas ordes ministeriais, sendo a última a Orde APA/778/2005, do 30 de marzo, pola que se modifica a Orde APA/345/2005, do 9 de febreiro, pola que se establecen medidas específicas de protección en relación coa lingua azul, e se prorroga a súa vixencia ata o 15 de abril de 2005 incluído. Unha vez analizados os datos obtidos co Programa nacional de vixilancia entomolóxica e serolóxica, e os datos históricos, xa non concorren as circunstancias que posibilitan un réxime de movementos específico para as zonas estacionalmente libres, polo que procede a publicación dunha nova orde en que se establezan as medidas que se vaian aplicar fronte á lingua azul.

Con base na situación epidemiolóxica na zona restrinxida en España pola lingua azul, e debido á dificultade de manexo das reses de lida, faise necesario implantar un control sanitario específico para as devanditas reses cando se destinen a espectáculos taurinos, que garanta que a enfermidade non se transmite ao resto do territorio, en función do tipo de espectáculo e de acordo coa avaliación e xestión de risco que leven a cabo as autoridades sanitarias competentes segundo o establecido na presente orde.

Na súa virtude, e ao abeiro do establecido no artigo 8 da Lei de sanidade animal, e na disposición derradeira segunda do Real decreto 1228/2001, do 8 de novembro, dispoño:

Artigo 1. *Obxecto e ámbito de aplicación.*

O obxecto da presente orde é establecer medidas específicas de protección contra a lingua azul, de aplicación a todo o territorio nacional.

Artigo 2. *Definicións.*

Para os efectos desta orde serán de aplicación, ademais das definicións previstas nos artigos 3 da Lei 8/2003, do 24 de abril, de sanidade animal, 2 do Real decreto 1228/2001, do 8 de novembro, polo que se establecen medidas específicas de loita e erradicación da febre catarral ovina ou lingua azul, e 2 a) do Real decreto 1939/2004, do 27 de setembro, polo que se regula a cualificación sanitaria das gandarías de reses de lida e o movemento dos animais pertencentes a estas, as seguintes:

a) Zona restrinxida: a Comunidade Autónoma de Illes Balears, a Comunidade Autónoma de Extremadura, as cidades autónomas de Ceuta e Melilla e as seguintes provincias ou comarcas veterinarias:

Na Comunidade Autónoma de Andalucía, as provincias de Cádiz, Málaga, Huelva, Sevilla e Córdoba e as comarcas veterinarias de Jaén e Andújar na provincia de Jaén.

Na Comunidade Autónoma de Castilla-La Mancha, as comarcas veterinarias de Oropesa, Belvís de la Jara, Talavera de la Reina e Los Navalmorales, da provincia de

Toledo e as comarcas veterinarias de Horcajo de los Montes, Piedrabuena, Almadén e Almodóvar del Campo na provincia de Ciudad Real.

b) Zona libre: o resto do territorio nacional.

c) Centro de mostraxe para a lingua azul: aquela instalación baixo control da autoridade veterinaria competente, na cal se mantén un grupo illado de animais protexidos da acción de Culicoides, ben por ser unha instalación creada para tal fin ben por ser unha explotación gandeira na cal se colocasen os dispositivos necesarios para impedir a entrada de Culicoides, durante un período de tempo adecuado, co fin de someter os animais a probas de diagnóstico fronte á lingua azul.

En caso de que se trate de instalacións onde se agrupen animais de distintas orixes co fin de sometelos a probas de diagnóstico fronte á lingua azul, remitirase á Subdirección Xeral de Sanidade Animal do Ministerio de Agricultura, Pesca e Alimentación a información pertinente co fin de elaborar unha listaxe das devanditas instalacións.

d) Espectáculo taurino: os clasificados así no artigo 25 do Real decreto 145/1996, do 2 de febreiro, polo que se modifica e dá nova redacción ao Regulamento de espectáculos taurinos. Tendo en conta o risco sanitario fronte á lingua azul, os espectáculos taurinos clasifícanse en dous grupos:

Tipo I: espectáculos taurinos en prazas con desembarco das reses nas 24 ou 48 horas previas á lida ou sacrificio, e en que os animais estean en destino protexidos do vector transmisor da lingua azul. Para tal efecto, os animais permanecerán no touril ou en currais protexidos da acción do vector, ben por estaren arquitectonicamente cerrados, ben por se teren colocadas teas mosquiteiras asperxidas con produtos repelentes nos lugares en que permanezan os animais, os cales poderán abandonar exclusivamente durante un período de tempo mínimo co fin de proceder aos recoñecementos previos á lida que exige a lexislación vixente.

Tipo II: espectáculos taurinos celebrados fóra das prazas de touros, outros espectáculos taurinos e aqueles espectáculos previstos como tipo I cuxos organizadores non acheguen a documentación requirida ou non cumpran os requirimentos de protección dos animais fronte ao vector.

Artigo 3. *Movimentos para vida desde a zona restrinxida.*

1. Todo movemento para vida dos animais das especies sensibles, procedentes de explotacións asentadas na zona restrinxida, poderase realizar co cumprimento dos seguintes requisitos xerais:

a) Os animais que se vaian transportar non presentarán signos clínicos de lingua azul o día do seu transporte.

b) Os animais serán transportados en vehículos de transporte que deberán ser desinsectados antes da carga. Cando o destino dos animais sexa outra comunidade autónoma distinta da de orixe, o transporte realizarase en vehículos precintados pola autoridade competente. En todo caso, sempre que os animais abandonen a zona restrinxida, o transporte realizarase en vehículos precintados pola autoridade competente.

c) A carga e o transporte dos animais realizaranse preferentemente nas horas centrais do día ou da noite e, en todo caso, fóra das horas de máxima actividade do vector.

d) Todos os animais sensibles obxecto de movemento serán previamente tratados cun desinsectante ou repelente, cunha antelación máxima de 5 días naturais previos ao transporte. Nas explotacións de orixe terase

procedido á desinsectación previa dos locais e arredores en que permanezan os animais.

e) Todos os animais que abandonen a zona restrinxida para o seu movemento para vida dentro de España deberán estar marcados, de forma que se impida o seu traslado posterior a outro Estado Membro da Unión Europea. Esta marcación realizarase, polo menos, no documento de identificación bovina (DIB) dos animais bovinos, previsto no Real decreto 1980/1998, do 18 de setembro, polo que se establece un sistema de identificación e rexistro dos animais da especie bovina, así como nas bases informáticas de movemento de gando previstas no Real decreto 479/2004, do 26 de marzo, polo que se establece e regula o Rexistro Xeral de Explotacións Gandeiras. No resto de ruminantes, a marcación efectuarase mediante unha marca auricular de cor vermella no caso de animais non vacinados ou de cor azul ou verde en caso de animais vacinados. Na devandita marca figurará, polo menos, a lenda «LA».

2. Ademais dos requisitos do punto anterior, segundo o destino dos animais, deberánse cumprir os seguintes requisitos adicionais en función do tipo de movemento:

a) Os animais de especies sensibles de explotacións situadas na zona restrinxida poderanse mover para vida directamente a territorio doutros Estados membros logo de autorización do Estado membro de destino, coas condicións que establece para o efecto a Decisión 2003/828/CE, da Comisión, do 25 de novembro de 2003, relativa ás zonas de protección e vixilancia en relación coa febre catarral ovina, ou a que poida substituíla no futuro.

b) Os animais de especies sensibles de explotacións situadas na zona restrinxida poderanse mover para vida ao resto do territorio nacional coas condicións que establece a Decisión 2003/828/CE, da Comisión, do 25 de novembro de 2003, ou a que poida substituíla no futuro. Así mesmo, os animais obxecto de traslado deberán cumprir, polo menos, algunha das condicións indicadas no anexo.

Sen prexuízo diso, cando se trate do movemento de ovinos menores de dous meses de idade desde zona restrinxida con destino a ceiba, a explotacións asentadas en zona libre, dentro do territorio nacional, os animais quedarán inmovilizados na explotación de destino e protexidos do ataque de Culicoides e terán como único destino final o sacrificio en matadoiros nacionais. Para tal efecto, as autoridades competentes das comunidades autónomas elaborarán unha listaxe de explotacións de ceiba de ovino que cumpran os requisitos hixiénico-sanitarios para a súa autorización para recibir ovinos de ceiba de menos de dous meses de zonas de restrición. Esta listaxe seralle remitida á Subdirección Xeral de Sanidade Animal do Ministerio de Agricultura, Pesca e Alimentación co fin de elaborar unha listaxe nacional e poñela á disposición das autoridades competentes das comunidades autónomas.

c) A autoridade competente en sanidade animal da comunidade autónoma poderá autorizar o movemento para vida de especies sensibles dentro do seu territorio, na zona restrinxida, de acordo cos requisitos adicionais que ela mesma estableza, se é o caso.

3. No certificado oficial de movemento previsto no artigo 50 da Lei de sanidade animal, ou como documentación adxunta a el, constará, ademais da identificación dos animais obxecto de movemento, a documentación acreditativa do desinsectante ou repelente empregado (incluído o produto usado, data de aplicación e, se é o caso, tempo de espera), así como a identificación do responsable en orixe da aplicación das devanditas medidas e, nos casos en que así proceda de acordo con este artigo, a documentación acreditativa do resultado das análises

de laboratorio efectuadas aos devanditos animais e a identificación do recinto do medio de transporte.

4. Todo movemento de animais de especies sensibles entre dúas comunidades autónomas, con orixe en explotacións situadas en zona restrinxida, deberalle ser notificado pola autoridade competente en sanidade animal da comunidade autónoma de orixe á autoridade competente en sanidade animal da comunidade autónoma de destino cunha antelación mínima de 48 horas.

Artigo 4. Movements para sacrificio desde a zona restrinxida.

1. Os animais de especies sensibles de explotacións situadas na zona restrinxida poderanse mover para sacrificio directamente a territorio doutros Estados membros logo de autorización do Estado membro de destino, coas condicións que establece a Decisión 2003/828/CE, da Comisión, do 25 de novembro de 2003, ou a que poida substituíla no futuro.

2. Os requisitos para autorizar os movementos para sacrificio de animais de especies sensibles desde explotacións radicadas na zona restrinxida, con destino a outra comunidade autónoma, incluídos movementos entre zonas restrinxidas de distintas comunidades autónomas, ou con destino a zona libre da mesma comunidade autónoma, serán os seguintes:

a) Os animais que se vaian transportar non presentarán signos clínicos de lingua azul o día do seu transporte.

b) Os vehículos de transporte deberán ser desinfectados antes da carga.

c) A carga e o transporte dos animais realizaranse preferentemente nas horas centrais do día ou da noite e, en todo caso, fóra das horas de máxima actividade do vector.

d) Os animais serán transportados ao matadoiro para o seu sacrificio inmediato, baixo supervisión oficial. Cando o destino dos animais sexa outra comunidade autónoma distinta da de orixe, o transporte será realizado en vehículos precintados pola autoridade competente. En todo caso, sempre que os animais abandonen a zona restrinxida, o transporte realizarase en vehículos precintados pola autoridade competente. A autoridade competente responsable do matadoiro será informada da intención de lle enviar animais a este e notificaralle a súa chegada á autoridade sanitaria competente en materia de expedición.

e) Cando os movementos para sacrificio teñan por destino matadoiros localizados fóra da zona restrinxida da comunidade autónoma de orixe, no matadoiro, así como na explotación de orixe, terase procedido á desinsectación previa dos locais e arredores en que vaian permanecer os animais. Non obstante, a autoridade competente en sanidade animal da comunidade autónoma de destino poderá exceptuar da previa desinsectación o matadoiro de destino cando este se encontre situado en zona libre e non exista risco de presenza do vector.

f) Os animais obxecto de movemento serán previamente tratados cun desinsectante ou repelente cunha antelación máxima de 7 días naturais ao do transporte, tendo en conta o período de supresión do produto empregado.

3. No certificado oficial de movemento previsto no artigo 50 da Lei de sanidade animal, ou como documentación adxunta a este, constará, ademais da identificación dos animais obxecto de movemento, a documentación acreditativa do desinsectante ou repelente empregado (incluído o produto usado, data de aplicación e, se é o caso, tempo de espera), así como a identificación do responsable en orixe da aplicación das devanditas medidas,

e, nos casos en que así proceda de acordo con este artigo, a identificación do recinto do medio de transporte.

4. Todo movemento de animais de especies sensibles entre dúas comunidades autónomas, con orixe en explotacións situadas en zona restrinxida, deberalle ser notificado pola autoridade competente en sanidade animal da comunidade autónoma de orixe á autoridade competente en sanidade animal da comunidade autónoma de destino cunha antelación mínima de 48 horas.

Artigo 5. Movements de reses de lida destinados a espectáculos taurinos, desde a zona restrinxida.

1. Poderanse autorizar, cos requisitos mínimos seguintes, os movementos de reses de lida desde zona restrinxida, con destino a espectáculos taurinos noutra comunidade autónoma ou en zona libre da mesma comunidade autónoma:

a) Os organizadores que pretendan recibir unha partida de reses de lida de zona restrinxida de España para o desenvolvemento dun espectáculo taurino deberanllo comunicar á autoridade competente en materia de sanidade animal da comunidade autónoma de destino, cunha antelación mínima de 30 días naturais á data prevista de chegada dos animais ao seu destino.

No devandito comunicado constará polo menos a seguinte documentación:

Identificación do empresario en que figure nome, NIF ou CIF, razón social, teléfono e fax de contacto.

Número de animais previstos da partida con identificación deles, así como explotación de orixe e a súa localización (municipio e provincia).

Data prevista do traslado, data prevista de chegada dos animais e data de celebración do espectáculo taurino.

Descrición detallada do espectáculo ou espectáculo taurino, indicando a posibilidade de animais de reserva e número previsto.

Clasificación tipo I ou II prevista do espectáculo, con base na definición do artigo 2.

Características do recinto taurino e instalacións anexas, así como a súa localización.

Certificación do empresario, en que se responsabilice da realización das seguintes actuacións:

Desinsectación previa dos recintos taurinos, así como dos animais de lida desde a súa chegada, e en tantas ocasións como requira a autoridade competente da comunidade autónoma de destino.

Tratamento desinsectante ou repelente dos animais equinos e animais de especies sensibles que vaian entrar en contacto cos animais da partida.

Transporte e eliminación, cando proceda, dos animais sacrificados ou mortos, de acordo coa lexislación vixente.

Sacrificio de todos os animais da partida con orixe na zona restrinxida (non lidados, indultados, touros de reserva ou non aptos no recoñecemento), ou actuacións que se realicen para a reexpedición no prazo máximo de 12 horas tras a finalización do espectáculo taurino directamente á explotación de orixe.

b) O órgano competente en sanidade animal de destino informará, no prazo mínimo de 20 días naturais antes da data prevista para o movemento dos animais, a autoridade competente en sanidade animal de orixe e o organizador responsable do espectáculo, da autorización, se é o caso, do movemento da partida e das condicións en que este se debe producir, que serán as seguintes:

Para a celebración dos espectáculos de tipo I, os animais serán tratados cun desinsectante ou repelente cunha antelación máxima de 7 días naturais ao do embarque. No momento de chegar ao seu destino, os animais serán

tratados novamente mediante a aplicación dun insecticida ou repelente.

Para a celebración dos espectáculos de tipo II, os animais serán tratados cun desinsectante ou repelente cunha antelación máxima de 7 días naturais ao do embarque. A autoridade sanitaria competente en destino realizará unha avaliación de risco e poderá requirir a realización de actuacións adicionais a todos os animais da partida con base nunha análise de risco, que terá en conta, polo menos, os seguintes elementos:

Resultados obtidos no programa de vixilancia entomolóxica.

Condições hixiénico-sanitarias do lugar de celebración do espectáculo así como das instalacións para a súa celebración.

Proximidade dos recintos a outras explotacións gandeiras de animais sensibles.

Clase de espectáculo taurino e a súa duración.

Época do ano en que terá lugar o espectáculo.

Con base no resultado da avaliación de risco do espectáculo de tipo II, a autoridade competente de destino poderá determinar que se leven a cabo todas ou algunha das seguintes actuacións adicionais:

Todos os animais da partida serán tratados en orixe cun desinsectante ou repelente baixo supervisión veterinaria, cunha antelación de 7 días naturais ao da toma de mostras para a realización dun control analítico de PCR, que deberá resultar negativo para a autorización de movemento. No momento da toma de mostras, os animais serán tratados novamente cun produto desinsectante ou repelente. O movemento deberase producir nos 7 días naturais posteriores ao da toma de mostras.

A aparición dun animal positivo a PCR dará lugar á realización dun estudo epidemiolóxico polas autoridades de sanidade animal de orixe, co fin de descartar a existencia de circulación viral. En caso de descartarse, o ou os animais positivos poderanse substituír por outros animais con resultado negativo que fosen sometidos ao tratamento con desinfectante ou repelente e ao da toma de mostras previstos neste punto.

No momento de chegaren ao seu destino, os animais serán tratados novamente mediante a aplicación dun insecticida ou repelente. Este tratamento será aplicado tantas veces como o coide oportuno a autoridade sanitaria competente en destino.

c) O gandeiro deberalle solicitar autorización para o movemento á autoridade competente en sanidade animal en orixe cunha antelación mínima de 15 días naturais ao do traslado dos animais. Xunto á devandita solicitude achegárase a documentación acreditativa das seguintes actuacións:

Programa rutineiro, supervisado por un responsable sanitario, de desinsectación dos locais e arredores en que permanezan os animais, especialmente dos currais ou instalacións de illamento, os currais de achique, tourís e manga sanitaria e de carga.

Programa rutineiro de desinsectación ou desparasitación con ectoparasiticidas dos animais.

No caso de espectáculos taurinos do tipo II, cando proceda, solicitude de supervisión do tratamento con desinfectante ou repelente, así como solicitude de toma de mostras tras a aplicación do desinsectante ou repelente, para a realización de probas analíticas.

d) O interior dos caixóns ou cubículos individuais dos vehículos en que sexan transportados os animais deberá ser desinsectado antes da carga.

e) A carga e o transporte dos animais realizaranse, preferentemente, nas horas centrais do día ou da noite e, en todo caso, fóra das horas de máxima actividade do vector.

f) Os animais serán transportados directamente ao recinto taurino en vehículos cuxos caixóns ou cubículos, tanto baleiros como con animais, deberán estar precintados pola autoridade competente, baixo supervisión oficial.

g) O organizador do espectáculo notificaralles ás autoridades sanitarias a chegada dos animais ao seu destino, as cales comparecerán ou habilitarán o persoal correspondente para proceder ao desprecintado do camión, controlar a documentación e realizar aquelas actuacións que consideren oportunas.

h) A autoridade competente de destino notificaralle a súa chegada á autoridade competente en materia de sanidade animal de orixe.

i) No certificado oficial de movemento previsto no artigo 50 da Lei de sanidade animal, ou como documentación adxunta a el, constará, ademais da identificación dos animais obxecto de movemento, nos casos en que así proceda, a documentación acreditativa do resultado das análises de laboratorio efectuadas aos devanditos animais, do desinsectante ou repelente empregado (incluído o produto usado, data de aplicación e, se é o caso, tempo de espera), a identificación do recinto do medio de transporte, así como a identificación do responsable en orixe da aplicación das devanditas medidas.

j) Os animais deberán estar marcados antes de abandonar a zona restrinxida. Esta marcación realizarase, polo menos, no documento de identificación bovina (DIB) dos animais bovinos, previsto no Real decreto 1980/1998, do 18 de setembro, así como nas bases informáticas de movemento de gando previstas no Real decreto 479/2004, do 26 de marzo.

k) Nos recintos taurinos en que se vaia efectuar o espectáculo, efectuarase unha desinsectación previa dos locais e arredores onde vaian permanecer os animais, por parte dos seus propietarios ou empresa organizadora, baixo supervisión veterinaria.

l) Os equinos e cabestros ou outros animais sensibles que puidesen entrar en contacto cos animais da partida deben estar previamente desinsectados e tratados con repelente, baixo supervisión veterinaria.

m) Os animais da partida permanecerán ata o momento da celebración do espectáculo ou tras a celebración deste ata o momento do seu sacrificio no caso de autorización de touros de reserva, protexidos do ataque de Culicoides ben mediante a súa inmovilización en instalacións cerradas ben mediante a aplicación dun tratamento desinsectante ou repelente, polo menos unha vez cada 5 días naturais.

n) Os animais a que non se lles dese morte durante a celebración do espectáculo serán sacrificados ou reexpedidos directamente á explotación de orixe nun prazo máximo de 12 horas tras a celebración do espectáculo.

Non obstante, a autoridade sanitaria de destino, con base na análise de risco, poderá autorizar, nas condicións que esta estableza, a permanencia dos animais de reserva nos recintos taurinos durante máis tempo ata a súa morte ou a súa reexpedición á explotación de orixe.

No caso de reexpedición, os animais serán tratados novamente cun produto desinfectante ou repelente inmediatamente antes do embarque. O vehículo de transporte será desinsectado antes da carga e os caixóns ou cubículos, tanto baleiros como con animais, deberán estar desinsectados e precintados baixo supervisión da autoridade competente.

A autoridade sanitaria de orixe notificaralles a reexpedición dos animais ás autoridades sanitarias de destino onde radique a explotación, as cales realizarán as actuacións necesarias para comprobar a chegada dos devanditos animais.

2. O incumprimento das garantías sanitarias establecidas neste artigo, especialmente daquelas que supoñan un risco de difusión da enfermidade, autorizará as autori-

dades sanitarias competentes para ordenaren o sacrificio e destrución inmediata dos animais da partida, correndo o organizador do espectáculo cos gastos derivados da devandita actuación.

3. Cando o movemento de reses de lida se produza entre unha zona restrinxida e unha zona libre dentro da mesma comunidade autónoma, as referencias á autoridade competente en materia de sanidade animal de orixe e de destino contidas neste artigo entenderanse feitas aos órganos competentes que correspondan da comunidade autónoma.

Artigo 6. *Esperma, óvulos e embrións.*

O traslado de esperma, óvulos e embrións de doadores de zona restrinxida rexeráse polo previsto na Decisión 2003/828/CE, da Comisión, do 25 de novembro de 2003, ou a que poida substituíla no futuro.

Artigo 7. *Zona libre.*

Os movementos de saída desde unha zona libre, ou dentro da devandita zona, de animais de especies sensibles, tanto para vida como para sacrificio, ou con destino a espectáculos taurinos, non están sometidos a ningunha condición específica con motivo da lingua azul.

Artigo 8. *Tránsito por zona restrinxida.*

O tránsito de animais sensibles expedidos a partir dunha zona libre, a través de zona restrinxida, con destino directo a outra zona libre, queda prohibido.

Artigo 9. *Animais das especies equinas.*

Para os movementos de animais das especies equinas, con orixe en explotacións situadas na zona restrinxida, deberanse cumprir as seguintes condicións:

a) Os animais obxecto de movemento terán sido desinsectados como máximo dentro dos 5 días naturais previos ao movemento. Así mesmo, os vehículos de transporte deberán ser desinsectados antes da carga.

b) A carga e o transporte dos animais realizarase fóra das horas de máxima actividade do vector.

Artigo 10. *Réxime sancionador.*

En caso de incumprimento do disposto na presente orde será de aplicación o réxime de infraccións e sancións previsto na Lei de sanidade animal, sen prexuízo das posibles responsabilidades civís, penais ou doutra orde que poidan concorrer.

Disposición transitoria única. *Movemento de reses de lida para a celebración de espectáculos taurinos antes do 23 de maio de 2005.*

1. Malia o disposto no artigo 5, o movemento de reses de lida desde zonas restrinxidas con destino a espectáculos taurinos de tipo I que teñan lugar en territorio nacional ata o 23 de maio de 2005, incluído, poderase autorizar co cumprimento das condicións previstas nas letras d) a n), ambas inclusive, e coa certificación do organizador do espectáculo do cumprimento do establecido na letra a) do artigo 5.1.

Todas as reses de lida da partida serán tratadas cun desinsectante ou repelente cunha antelación máxima de 7 días naturais previos ao do embarque.

2. Os animais que se deban empregar en espectáculos taurinos de tipo II que vaian ter lugar ata o 23 de maio de 2005, incluído, só poderán abandonar a zona res-

trinxida co cumprimento do anexo II da Decisión 828/2003/CE, da Comisión, do 25 de novembro de 2003.

3. Os movementos previstos nesta disposición requirirán a autorización expresa da comunidade autónoma de destino.

Disposición derogatoria única. *Derrogación normativa.*

Quedan derogadas cantas normas de igual ou inferior rango se opoñan ao disposto nesta orde e, en especial, a Orde APA/245/2005, do 9 de febreiro, pola que se establecen medidas específicas de protección en relación coa lingua azul e a Orde APA/778/2005, do 30 de marzo, pola que se modifica a Orde APA/245/2005, do 9 de febreiro, pola que se establecen medidas específicas de protección en relación coa lingua azul, e se prorroga a súa vixencia ata o 15 de abril de 2005 incluído.

Disposición derradeira primeira. *Habilitación normativa e título competencial.*

A presente orde dítase de acordo co previsto no artigo 149.1.16.^a da Constitución, polo que se lle atribúe ao Estado a competencia exclusiva en materia de bases e coordinación xeral da sanidade, coa excepción da regulación relativa aos movementos con países terceiros, que se dita de acordo co previsto no artigo 149.1.16.^a, primeiro inciso, da Constitución, polo que se lle atribúe ao Estado a competencia exclusiva en materia de sanidade exterior.

Disposición derradeira segunda. *Entrada en vigor.*

A presente orde entrará en vigor o mesmo día da súa publicación no «Boletín Oficial del Estado».

Madrid, 14 de abril de 2005.

EPINOSA MANGANA

ANEXO

Requisitos mínimos para os movementos de animais de especies sensibles á lingua azul, desde explotacións situadas en zona restrinxida

Que se cumpran as condicións do anexo II da Decisión 2003/828/CE, da Comisión, do 25 de novembro de 2003, relativa ás zonas de protección e vixilancia en relación coa febre catarral ovina ou as previstas na que poida substituíla no futuro.

Non obstante, cando se trate de animais de explotacións asentadas en zona restrinxida cuxo movemento se ampare no cumprimento do requisito de teren estado protexidos dos ataques de Culicoides durante o período mínimo previsto na normativa comunitaria vixente ao iniciar o traslado, para autorizar o devandito movemento será preciso, polo menos, que se obtivese en todos os animais da partida un resultado analítico negativo á lingua azul.

Ou que se trate de animais vacinados contra a lingua azul entre 30 días e un ano antes do movemento.

Ou que se trate de ovinos non vacinados de ata dous meses de idade nados de femias vacinadas, con destino a ceba, en cuxo caso os animais só se poderán destinar a cebadeiros autorizados polas autoridades competentes de destino.

Nos centros de reagrupamento ou de tipificación dos devanditos ovinos realizarase unha mostraxe de cada partida para control analítico mediante PCR nun número de animais da partida tal que asegure, polo menos, o achado dun animal infectado cunha prevalencia do 30 % e un intervalo de confianza do 95 %.

Ou que se trate de ovinos non vacinados de ata dous meses de idade nados de femias non vacinadas en

explotacións asentadas en comarcas veterinarias onde non se vacinase o gando ovino, con destino a ceba, en cuxo caso só se poderán destinar a cebadeiros autorizados polas autoridades competentes de destino.

Así mesmo, en cada partida realizarase unha toma de mostra para a realización dun control analítico con resultado negativo, previo ao movemento, mediante a técnica ELISA nun número de animais tal que asegure, polo menos, o achado dun animal infectado cunha prevalencia do 2 % e un intervalo de confianza do 95 %.

MINISTERIO DA PRESIDENCIA

6122 *REAL DECRETO 425/2005, do 15 de abril, polo que se establecen os requisitos técnicos e as normas de actuación que deben cumprir os centros técnicos para a instalación, verificación, control e inspección de tacógrafos dixitais.* («BOE» 91, do 16-4-2005.)

O Regulamento (CEE) n.º 3821/85 do Consello, do 20 de decembro de 1985, relativo ao aparello de control no sector dos transportes por estrada, cuxas últimas modificacións son o Regulamento (CE) n.º 2135/98 do Consello, do 24 de setembro de 1998, e o Regulamento (CE) n.º 1360/2002 da Comisión, do 13 de xuño de 2002, establece no seu artigo 12 que unicamente poderán realizar operacións de instalación e reparación do aparello de control (tacógrafo) os instaladores ou talleres autorizados para tal fin polas autoridades competentes dos Estados membros, unha vez oído, se así o exixisen as ditas autoridades, o ditame dos fabricantes autorizados. Así mesmo, na parte VI do anexo IB (verificacións, controis e reparacións) dispónse que os Estados membros aprobarán, inspeccionarán periodicamente e certificarán os organismos encargados de realizar instalacións, verificacións, controis e reparacións dos tacógrafos dixitais.

A importante función que desempeñarán os tacógrafos dixitais no ámbito da seguridade viaria fai necesario establecer os requisitos técnicos que deben cumprir os centros técnicos nos cales se realizarán as operacións que están recollidas no artigo 12 do Regulamento (CEE) n.º 3821/85 e nos capítulos V e VI do seu anexo IB, que lles permitan ás comunidades autónomas procederem á súa autorización, así como as normas de actuación dos ditos centros.

Dado que as actividades que desenvolverán os centros técnicos son requiridas aos usuarios pola regulamentación vixente, tanto as normas de actuación como os requisitos técnicos deben garantir, en todo o territorio nacional, a alta calidade e homoxeneidade das instalacións, inspeccións e reparacións dos tacógrafos dixitais, sen prexuízo daqueles outros condicionantes que as comunidades autónomas en virtude das súas competencias poidan establecer.

Este real decreto dítase ao abeiro das competencias exclusivas do Estado en materia de tráfico e circulación de vehículos de motor establecidas polo artigo 149.1.21.^a da Constitución.

Este real decreto foi sometido a información dos sectores afectados, segundo o previsto no artigo 24.1.c) da Lei 50/1997, do 27 de novembro, do Goberno, e ao procedemento de información de normas e regulamentacións técnicas e de regulamentos relativos á sociedade da información, regulado polo Real decreto 1337/1999, do 31 de xullo, para os efectos de lle dar cumprimento ao disposto na Directiva 98/34/CE do Parlamento Europeo e do Conse-

llo, do 22 de xuño de 1998, modificada pola Directiva 98/48/CE do Parlamento Europeo e do Consello, do 20 xullo de 1998.

Na súa virtude, por proposta do ministro de Industria, Turismo e Comercio, do ministro do Interior e da ministra de Fomento, de acordo co Consello de Estado e logo de deliberación do Consello de Ministros na súa reunión do día 15 de abril de 2005,

DISPONGO:

Artigo 1. *Finalidade.*

O obxecto deste real decreto é establecer os requisitos técnicos e as normas de actuación que deben cumprir os centros técnicos para a instalación, verificación, control e inspección de tacógrafos dixitais.

Artigo 2. *Definicións.*

1. Son centros técnicos de tacógrafos dixitais (en diante, centros técnicos) as entidades que teñen por obxecto a execución material das intervencións técnicas que se deban realizar sobre os tacógrafos dixitais e que fosen autorizadas previamente polo órgano competente en materia de industria do territorio onde estean radicadas, de acordo co Regulamento xeral de vehículos, aprobado polo Real decreto 2822/1998, do 23 de decembro, co Regulamento (CEE) n.º 3821/85 do Consello, do 20 de decembro de 1985, relativo ao aparello de control no sector dos transportes por estrada, modificado polo Regulamento (CE) n.º 2135/98 do Consello, do 24 de setembro de 1998, adaptado polo Regulamento (CE) n.º 1360/2002 da Comisión, do 13 de xuño de 2002, e demais disposicións aplicables.

2. Por intervención técnica enténdese calquera das operacións que están recollidas no artigo 12 do Regulamento (CEE) n.º 3821/85 e nos capítulos V e VI do seu anexo IB, incluso as reparacións da instalación, pero non as reparacións do sensor e da unidade intravehicular do tacógrafo dixital.

Non se considerará intervención técnica a montaxe e a programación parcial de parámetros de tacógrafos dixitais desactivados realizada en liña de montaxe polo fabricante do vehículo.

As reparacións a que deban ser sometidos tanto o sensor de movemento como a unidade intravehicular do tacógrafo dixital serán realizadas baixo o control directo do seu fabricante ou representante legal e cumprindo cos obxectivos de seguridade de fabricación.

3. Por tacógrafo dixital enténdese o aparello de control que se axusta aos requisitos do anexo IB do Regulamento (CEE) n.º 3821/85.

Artigo 3. *Incompatibilidades dos centros técnicos.*

Sen prexuízo do réxime de incompatibilidades que poida establecer a Administración competente, os socios ou directivos do centro técnico e o seu persoal no poderán ter participación en actividades de transporte por estrada.

Artigo 4. *Entidades que poden ser autorizadas como centros técnicos.*

1. Poderán ser autorizadas como centros técnicos as seguintes entidades:

a) Os fabricantes e representantes legais de fabricantes estranxeiros de vehículos con instalacións produtivas en España en cuxos vehículos sexa necesario instalar tacógrafos dixitais.